

Date	9 Oktober 2013
Title	Destinasi alam sekitar gamit pelajar UNITEN
Publication	Berita Harian
Page	8

Destinasi alam sekitar gamit pelajar UNITEN

Taman Alam Kuala Selangor adalah destinasi hijau yang menggamit pencinta alam. Bagi sekumpulan mahasiswa Universiti Tenaga Nasional (UNITEN), peluang melawat dan berbakti di Taman Alam Kuala Selangor melalui projek 'Save the Mangroves' membawa mereka dekat dengan hutan paya bakau yang penuh misteri alam semula jadi.

Hutan paya bakau seperti yang terdapat di persisiran pantai bersempadan Kuala Selangor adalah identiti kawasan tropika dan menjadi ekosistem bagi kehidupan marin yang unik, disamping menjadi tempat persinggahan spesies burung penghijrah daripada beberapa buah negara seperti Russia, Mongolia, Siberia dan India.

157 spesies

Terdapat lebih 157 spesies burung tempatan dan migrasi di taman ini yang diuruskan Persatuan Pencinta Alam Malaysia sejak tahun 1987.

Projek Save the Mangroves yang dianjurkan Kelompok MURNI, UNITEN pada 15 hingga 17

Jun 2012 disertai 36 mahasiswa dari Malaysia dan juga antarabangsa seperti Botswana, Sudan, Syria dan Vietnam.

Selepas seharian membersihkan hutan paya bakau (mangrove clean-up) sewaktu air surut, peserta dapat merasakan satu pengalaman yang berbeza.

Seterusnya, mereka mengikuti program 'nature hunt' dan didedahkan dengan kaedah menyemai biji benih pokok bakau spesies jenis lendang dengan bantuan pegawai program mewakili Malaysian Nature Society dan Taman Alam Kuala Selangor, Ashok.

Peserta turut mengenali dengan lebih dekat hidupan hutan paya bakau seperti ikan belacak, ketam rehab, siput sedut, udang dan banyak lagi.

Mendidik peserta

Pengerusi Projek, Zuraidah Ali, berkata pengalaman membersihkan kawasan hutan paya bakau dan menanam benih pokok bakau mendedahkan mahasiswa kepada usaha konservasi hutan warisan negara.



Mahasiswa UNITEN menabur bakti sambil beriadah di Kuala Selangor.

“Pengalaman membersihkan kawasan hutan paya bakau mendedahkan mahasiswa kepada usaha konservasi hutan warisan negara”

Zuraidah Ali,
Pengerusi Projek Save the Mangroves

Tambahan pula, ia mendidik peserta menghargai biodiversiti seterusnya memahami peranan hutan paya bakau sebagai pelindung daripada bencana alam seperti tsunami, katanya.

Ahli Jawatankuasa Pelajar, Amin Sahari dan Azeera Azmi yang bertanggungjawab menghubungi pihak Majlis Daerah Kuala Selangor dan Taman Alam Kuala Selangor (KSNP) bagi projek itu berkata: “Kerjasama dan bantuan pihak berkenaan melancarkan dan meningkatkan keberkesanan program ini”.

Banyak ilmu yang dipelajari terutama berkaitan ekologi dan ekosistem khazanah hutan paya bakau, kata mereka.

Kehidupan kelip-kelip

Selepas menghabiskan waktu siang di Taman Alam Kuala Selangor, sebelah malam peserta dibawa menikmati keindahan kehidupan kelip-kelip iaitu projek ekopelancongan yang ditaja Tenaga Nasional Berhad (TNB).

Sebelum bertolak pulang ke kampus, kumpulan mahasiswa berkenaan turut melawat Bukit Melawati yang kaya dengan sejarah negeri Selangor.

Dua pelajar dari Vietnam, Huy Dang dan Ha Trong Hoa mengakui kagum dengan paparan sejarah di muzium Bukit Malawati dan akan berkongsi pengalaman ini bersama rakan-rakan antarabangsa yang lain.